

Angajoqqaat ukiumut 314.099 kr.-it ataallugit isertitallit meeqqat atuarfianni 9 aamma 10. klassimi atuartuutillit aningaasanik pisortaniit ikiorserneqarsinnaanissamut qinnuteqarsinnaangornissaat pillugu Naalakkersuisut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Malik Berthelsen, Siumut)

Akissuteqaat.

(Isumaginninnermut Naalakkersuisoq Maliina Abelsen)

Siullermeerneqarnera.

Malik Berthelsen qutsavigerusuppara, ilaqutariit meeqqat atuarfianni atuartuutillit meeqqaminnik pilersuiniarnermikkut atugaat pillugit saqqummiimmat. Siunnersuut angajoqqaat meeqqat atuarfianni 9. aamma 10. klassimi atuartuutillit ukiumut aalajangersimasut tikillugit isertitaqartartut aningaasatigut tapiiffigineqartarnissaannik imaqarpoq.

Innuttaasut amerlanerusut atugarissaarnerulernissaat tunaartaralugu Naalakkersuisut sulipput aamma atugarissaarnermut tunngasut tamaasa qitiutinniarlugit akileraarnermut atugarissaarnermullu ataatsimiititaliamik pilersitsipput.

Naalakkersuisut siunissaq ungasinnerusoq eqqarsaatigalugu aaqqiissuteqarnissaq pingaartippaat, ilaatigut isertitatigut assigiinnigissutsinik annertuumik naligiissaarinnissaq ilaavoq. Tassami akileraarnermut atugarissaarnermullu ataatsimiititaliaq pilersinneqarpoq, Kalaallit Nunaanni innuttaasut annertuumik naligiinnigissuseqarlutik inuuniarnermikkut atugaqarnerat toqqammavigalugu kissaatigineqarmat taamak inissisimaneq allanngortinneqassasoq. Ataatsimiititaliap suliaa ukiup tulluuttup aallartinnerani piareerneqarsimassaaq.

Meeqqanut inuusuttunullu tunngasut ukioq manna “Meeraanermi toqqissisimaneq 2010”-mi immikkut suliniuteqarfigineqassapput tassungalu peqatigitillugu maannakkut meeqqat inuusuttullu ataatsimut isigalugit periusissiortoqarpoq, taanna Inatsisartunut UPA 2011-mi saqqummiunneqassaaq.

UPA 2010-mi Inatsisartut aalajangiippat atuartunut angajullinerusunut tapisiaqartitsisarneq pillugu inatsisartut peqqussutaat atorunnaarsinneqassasoq. Tamanna pivoq Inatsisartuni peqqissaartumik oqallisigineqarnerata kingorna, aamma inatsisartut peqqussutaatigut siunertarineqartup atuukkunnaarnera toqqammavigalugu.

Naalakkersuisut isumaqarput, angajoqqaat meeqqamik pilersornissaannut, tassani meeqqat atuarfianni 9. aamma 10. klassimi atuartuutillit pineqarput, aningaasatigut annikitsunik isertitaqartarpata, isumaginninnikkut maleruagassiani ilaqutariit taakku aningaasatigut tapiiffigineqarnissaannut arlariinnik periarfissaqartoq. Ilaatigut eqqaaneqarsinnaavoq, meeqqanut tapisiaqartitsisarneq isertitanut naleqqussagaalluni ingerlanneqarmat, tassani ilaqutariit atsinnerpaamik isertitaqartartut isiginiarneqarlutik. Aammattaaq eqqaaneqassaaq, siusinaartumik utoqqalinersiutillit aamma utoqqalinersiutillit meeqqanut tapisianik pisartagaqarsinnaammata.

Taamak oqaaseqarlutik Naalakkersuisut inassutigaat, angajoqqaat ukiumut 314.099 kr.-it ataallugit isertitaqartartut meeqqat atuarfianni 9. aamma 10. klassimi atuartuutillit aningaasanik pisortaniit

ikiorserneqarnissamik qinnuteqarsinnaanissaat pillugu periarfissiisoqarnissaanik
siunnersuuteqarneq itigartinneqassasoq.